





程朱闕里志



內閣文庫	
番號	漢 8951
冊數	7 ( 3 )
函號	287 107


三



© Kodak, 2007 TM: Kodak







程朱闕里志卷之三

明後學古歛

後學同邑

淺草文庫

趙滂編集

鮑應賢纂次

洪世俊

汪元功

畢懋良

方道通

畢懋康參閱

鮑觀光





汪自霑

程鳴瑞

趙有成

趙濟

曹應鶴同校

世考志

君子尚友必資論世先河後海源委固然尼父魯人而司馬遷作世家推本於宋至其自叙則曰丘殷人也皆不忘先世之意也學者於程朱三夫子有高山

之仰而世可不考乎篁墩以後世次纍纍可紀作世考志第三

宗系

有開必先邈厥令緒晉牧梁勳中山是啓虹井鍾靈考亭濟美本本元元無忘豐芭

程氏之先祖顓頊重黎周程伯休父其後也東晉永嘉初諱元譚者持節守新安有惠民請留賜第歛之篁墩因家焉新安之程自此始其著者爲忠壯公靈洗至裔孫六合令大辨因亂播遷再世徙



中山博野其著者爲文明殿學士羽又再世遷河  
南羽生虞部員外郎希振希振生黃陂令適適生  
太中大夫珣卽明道伊川二先生父也

朱氏之先亦祖顓頊至周封曹挾於邾子孫去邑以  
朱爲氏其後居歙之篁墩唐天祐中八世祖以陶  
雅之命總卒守婺源遂於萬安鄉松巖里居焉五  
世甫生振振生絢絢生森森生松卽晦菴先生父  
也

考新安程朱三夫子源流記

趙時勉

夫道之有統猶水之有源而人之有祖也乃後世學  
者每汨於多岐必得統先聖方可世爲後學宗焉故  
辨支流者必溯其源所自來而宗先正者不得忘其  
本所自出古先聖之統自孔孟而下一脈滙於朱子  
而朱子得之二程子人知朱子世家新安不知程之  
先亦自新安而徙也後世異說殄行淫祠徼福在在  
而是乃程朱故鄉鮮有知崇重者甚則攘臂操戈微  
獨趨之不定要亦核之不詳也余邑鄭時夫氏與余  
同里而同舉於鄉習知子祖德相公世稱博雅郡中



譜氏族多出其手程朱世系詢子考之詳矣鄭成進士晉祠部

奏立朱夫子後子竊有志建三夫子祠因按所考核而爲之記元禮部程公黜南書河南上程氏宜振錄後云河南夫子曾出中山中山之曾出自新安之黃墩實忠壯公之裔陳未播遷而北者也永新劉文安公定之記程氏義田云公之先家徽郡忠壯公靈洗蔓延厥系于海內明道伊川實祖之鄧州李文達公賢志程亞中公墓云靈洗仕陳至開府儀同三司謚

忠壯宋封忠烈王五世孫大辨徙中山博野六世少師羽再遷河南醴泉三世曰元白宋宜春令追封冀國公四世曰琳宋太師中書令謚文簡曰珣大中大夫子爲明道伊川二先生也李公心傳識伊川先生後譜系云靖康之難先生之孫辟狄流寓池州紹興褒錄黨人詔下提舉招二子之孫審驗其譜系上長孫觀之年七十四補登仕郎克池州州學學賓令本州于上供錢內支錢三千米二石俾奉祭祀次謙之子源四世嫡孫也赴吏部銓量補迪功郎本府志云



先代原有鄉賢祠併祀二程先生先儒胡雲峰撰文  
具新安文獻志謂程之河南實吾新安黃墩忠壯公  
後也按程叔子撰純公行狀河南之程出自中山博  
野又按歐陽公撰程文簡公父冀國公碑銘中山博  
野之程出自靈洗文簡公琳與大中公珣爲兄弟則  
新安爲河南所出何疑哉成化間知休寧縣歐陽公  
旦業已

奏建祠矣按朱夫子世家載之志而朱夫子自叙世  
譜後先世居歙之黃墩天祐中以陶雅之命總卒三

千戌婺源民賴以安因家焉祖曰森仕宋爲承仕郎  
配程生子三長曰松年踰髫髻以上舍登第授建州  
政和尉以父喪值亂寓建安之崇安服除調建州尤  
溪尉建炎間告歸十餘年紹興四年內翰綦密言於  
上召試館職除秘書省正字上言切至遷尚書度支  
員外郎兼史館校勘歷司勳吏部兩曹兼史職如故  
後以抗疏阻和議出知饒州請老得主管台州崇道  
觀交遊得人大明六藉要旨徽之理學寔開其先力  
行砥礪自謂性卞急害道因取佩韋之義名齋所著



有章齋集建炎四年庚戌九月十五日甲寅生熹於  
尤溪寓舍先是松生邑城有白氣如虹自井出至是  
復有紫氣如虹自井出其光上騰因名虹井母祝氏  
爲祝確女出於祝夫子歷有顯者世謂祝氏世生貴  
女然則新安爲程朱夫子所自出歷歷可據矣邇流  
於原生其鄉者可無崇祀之思哉竊維道之正統待  
人而傳由孔子而後曾子子思繼其微至孟子而始  
著由孟子而後周程張子繼其絕至朱子而始明朱  
子之學本之二程子朱子之生則本之新安粵稽程

子先世且自新安徙焉然則新安之地自昔崇正學  
之藪也由周而來得爲往聖繼絕學則生斯地者不  
容不奮矣今之人心豈異古昔之人心今之學術豈  
必古昔之學術亦未嘗以程朱所得統者自思奮焉  
耳故祠三夫子非獨爲三夫子也爲當世之人心也  
爲萬古之道脈也繼而起者誠秉吾道之旌旂執斯  
文之正印  
皇天后土將默相之嗟夫此予夙志也顧力不能從  
心姑記所考以俟來者



嘉靖元年龍集壬午十月朔旦

程朱三夫子源流考跋

程大賓

送予與計偕道經武城謁

先聖廟像故儼然在也竊訝

今上明詔後武城何獨得存舊制守者以趙侯泣留  
對及詢侯爵里則予鄉誠之先生也先生雅有志斯  
道予心切嚮往之厥後睹先生三夫子源流考乃知  
先生擬帥後學特祠之故鄉志念深矣夫紫陽得以  
博士奉祀裔同顏孟寔疏自先達鄭時夫先生於予

宗兩程夫子未遑議也先生考核謂宜躋諸紫陽尸  
祝新安道脉不益光昭乎哉卽未酬所願顧先生夙  
志允爲後學樹幟於鄉徵往俟來功當不在時夫先  
生下後有繼先生志者三夫子故鄉俎豆行且不朽  
先生樹幟之功亦且不朽

嘉靖甲子歲重陽日

程朱三夫子源流考跋

鮑觀光

余往欲建程朱三夫子祠于里與同志者歲時脩祀  
事于以講明正學底屬薰脩已從少司徒方定之先



生受祀三夫子議已友人趙伯雨氏滂持其故祖武  
城令誠之先生三夫子源流記示余因嘆兩先生之  
先得我心也所爲鼎建祠宇紹明聖學意在斯乎然  
斯事體大方先生謂俟有序乃以聞當道趙先生亦  
謂力不從心姑記之俟來者示不敢輕也夫二程子  
從遺經繼絕學而朱子申明之孔子之道賴以不墜  
卽方行天下無異同矧近其居者敢不自厲焉往朱  
夫子之後新安未有博士而我里叅政鄭時夫先生  
請立于

世廟至今因之然兩先生崇建廟貌之議寥寥無聞  
吾儕與有責矣誠之先生諱時勉伯雨之曾祖以舉  
人聽選卽抗疏言時務二十事

世廟可之下該部議舉行爲武城累有異政公之祖  
德相工詩文有清德里中有六逸祠相與焉今鞠爲  
茂草矣相子驥昌清苦好學弘治初舉脩

憲廟寶錄在宋有曰善璪者登嘉定進士累官至尚  
書郎有自警編行于世夫鄭方先生一代名宦而趙  
氏世有聞人可不謂聖人之徒歟鄭先生請立事竣



矣而祠可無議舉乎伯雨其珍重此編異時同志興起相與請建三夫子闕里于新安也厥功不可少矣萬曆丁未歲長至日

程朱三夫子源流考跋

洪世俊

學者景行往哲猶將襖寤寐於遐方矧枋榆近三賢之居源流宗六水之派者乎登崇祀典蓋無容須臾緩焉朱夫子鍾靈虹井聚精紫陽稽之傳記較若列眉矣其二程夫子出自新安則何以徵往歲同郡宦京邸者取吾鄉文獻志繙訂校讐豐城朱備萬先生

撰程忠愍侯神道碑叙其本忠壯公靈洗之後唐六合令大辨徙中山再徙河南生兩程夫子按譜索牒淵源可鏡也余歸里中則知巖鎮趙氏世稱文藪其王父誠之先生特著程朱源流考條分縷析與前志符合則三賢爲徽之自出文獻具在焉且也誠之先生其人足重也故其言益足徵也當其令武城時極饑修捄疏請蠲貸民賴以蘇卒之日歸櫬蕭然得配陳守專祠名宦僅互人公其選焉載觀上疏二十事通達國體似賈傳指切時弊似宣公而壹本於君心



之純則與三夫子當時告君語若出一軌彼其志行  
皈依故考證俎豆之念自殷耳辟之星緯中天萬國  
共仰焉然而分野所麗者則晞光尤近也水行地中  
四方被潤焉然而發源所肇者則沐浴更親也矧淫  
祠異宇相錯如繡黜邪崇正端在吾儒新安之崇祀  
三賢羹牆仰止夫亦嚮斗於野挹練水於梁已然則  
武城公所著源流考其將以譜系爲鱣羊余讚空言  
於未簡抑樂觀愛禮者見諸行耳

萬曆辛亥端陽月

程朱三夫子源流考跋

程 震

蓋太史公云詩有之高山仰止景行行止雖不能至  
然心嚮往之矧生於其鄉近先賢之居若此其甚乎  
新安以文獻著斐然鄒魯同風而朱子爲一代大儒  
伊洛爲紫陽心印宮牆相望於百里學脈淵源於一  
時論世尋源真後死事譬睹雲雨則測開先睹河海  
則探源委也浸淫末季異說殄行務張皇以立門戶  
甘發塚而號操戈卽紫陽功令不深信從而伊洛源  
流烏知所自是晉祠惡池而廢河齊祠配林而廢岱



失其本矣吾鄉誠之趙先生雅志斯道寤寐往哲考  
溯三賢爲新安自出而余家兩程夫子實系中山博  
野而祖先忠壯靈洗公慨然欲崇俎豆於吾鄉以觀  
法後學興起斯文其維道統正人心意甚切至余讀  
程朱源流考而知趙先生之意念深已文獻具在其  
言足徵其功亦不朽蓋自先生爲孝廉時已毅然以  
世道爲已任所上二十事具是矣筮仕武城奉

詔毀

先聖廟像普天皆爲烏有武城巋然獨存則以先生

號泣懇留欲存江漢秋陽之輝光以儀刑其鄉國也  
此卽羹牆三夫子於新安至意生紫陽之鄉官鄒魯  
之地志行皈依唯一聖三賢爲尸祝若先生者儻  
所稱賢聖之徒非歟祠於官祭於社不虛耳余是以  
願爲執鞭而跋其後

萬曆壬子七夕

程朱三夫子源流考跋

畢懋良

余觀程朱三夫子考未始不竊嘆淵源之有自來而  
嘉趙誠之先生之篤志斯道遠也蓋程朱三夫子先



後振起閩洛間赫然稱百代醇儒比邇先世原本及  
遠近從遷之跡實自吾邑黃墩始距今且數百年往  
矣世既不盡見先代實錄間相傳闕里二三耆舊稍  
能指點其處然亦幾幾荒臺野煙不且爲餼羊而祀  
宋乎哉先生篤行君子也而藏多奇書惟是綜其年  
譜世系與耳目所未經見者撮而紀之議崇祀三夫  
子于鄉寧詎使郡人士披牘而知文獻瞭若指掌兩  
冢在天之靈千秋萬歲後俎豆英英有生氣乎毋亦  
三夫子于吾道猶日月江河也于吾邑猶豐鎬洙泗

也高山之仰近則人爭守其功令以爲景行地私淑  
淑人嘉惠來學意蓋遠矣蓋先生雅以世道爲已任  
自孝廉時已上封事數千言慷慨有直聲令武城初  
旣以體統力爭再疏而肆赦青災三疏而議恤流亡  
讀之至涕淚千古不忍終篇若有得于三夫子愛君  
憂世之誠者先生蒞武城于今數十年武城尸祝先  
生有合祠又有專祠廟貌森然比方言子則其徵往  
俟來以一念真實自結契于紫陽伊洛間所從來矣  
讀其言想見其人鄉先生沒可祀于鄉其在斯與



萬曆癸丑七月

跋三夫子源流考

畢懋康

夫泉有沸濫河有伏源壑有歸墟而學猶是物已儒於吾郡若向杲杲崇安穆汝溪時莫不宗事紫陽氏矣然紫陽則源正公頤源純公顥三夫子者迺起絕學之後上繩孔孟下詔來茲豈不千載而一大儒得元統哉紫陽之緒肇於吾郡司勳松則邇系者業著其世矣惟河南醴泉二夫子出於中山博野大辨大辨系出吾郡忠壯霽洗洗故族於篁墩則自文弼趙

先生始核之矣而誠之先生復核諸文安核諸心傳核諸歐陽冀國之碑核諸雲峰祀二程之記嗚呼是豈張郡有大儒焉爾哉雖聖必從其朔雖聖而邇聖必系其祖天漢之始河太一之始水契之始孔子祖之也五行宗水水宗河河宗海則其委而已然則程朱雖麗河海有不祖天漢大一乎哉先生之功三夫子大矣功三夫子所以紹學紹學所以繩聖繩聖所以昭統昭統所以闢道夫道不足以經往緯來即起三夫子面詔之猶未免鄉人焉已程伯休父之於程



曹俠之於朱豈不稱系始乎然有三夫子則大於海  
已吾黨溯源術學而第以三夫子為師不第曰吾鄉  
云爾

萬曆乙卯朔月朔日

祖德

深山大澤發祥肇祉有德則興世濟其美挺生賢  
達若若纍纍其人可徵視諸文史

歛黃墩程忠壯公

靈洗

廟碑

羅願

壯士之出身用武以立功顯名於時者世常有之然  
能使其鄉百世思之者鮮矣中古以來相矜以權利  
有嚙臂而去其親為間而焚其孥臨陣而欺其友苟  
取一切不顧所厚其威則伸於敵矣而不見信於族  
黨其位則列於朝矣而不見譽於州里激揚人主之



前矜視同列得志富貴矣而不可以見故鄉之父老  
先世之丘墓往隨官留止不能復還使其子孫爲羈  
人於四方數世之後燕秦楚越兵而况能使其鄉百  
世思之者哉若吾州程公則不然公諱靈洗始梁侯  
景之亂公以布衣起義奉太守蕭隱以捍州里元帝  
因命以郡事以故此邦之人得免於亂陳高祖名號  
既著公晚而後屈猶及爲佐命上將當時論其功烈  
固以定配高祖之廟而鄉人追思其義亦相與祠之  
不忘今距州三十里有地名黃墩者墓與宅在焉宅

既匯爲湖其清可鑒時有巨魚出遊漁者莫敢取相  
傳天氣清晏往往見宮室其下云又卽其墓旁爲壇  
而祀之如是古矣水旱必求求必應比近祈報常八  
十餘社於是方氏者以爲古之祭用壇降及後世  
肖像以棲神設牀以安像非棟宇無以拒旁風仰雨  
之入故自郊社之外古百辟卿士在今者例皆廟事  
矧神出三代後乃獨用古之壇無益於實若廟而嚴  
之庶於時爲稱乃以某年月爲屋若干楹嗚呼吾乃  
今知有功烈者之不忘也古之見祭於人者當時則



祀過則舍之梁陳氏之去今六百餘年矣其恩及我者耳與目不接矣不接則宜懈以廢然益相與崇奉以壇爲未足昉於此乎立廟是非其道有可懷者乎由此觀之雖百世可知也於是方氏之進士曰必東因願所善張師顏以請乃爲之詩曰  
士生立朝終始于鄉一有可稱沒而不忘有用其力勤於衛上鐘鳴魏氏以從大饗有厚其黨而薄其躬燕齊相率社彼樂公赳赳儀同義烈兩出節扞父邦功書帝室於穆高廟龍姿曰容冠劍侑旁儼如在宮

其在于鄉壇壝是飭羔豚毋薄亦人之力偉哉如公神明之特優游祀典進退血食載祀六百物有廢興慨思昔賢廟食是矜古今異時器非豆登虛設壇陛捧莽易陵隨時稱物亦神所憑乃作新廟邦人所瞻物久則替我久益嚴坎其擊鼓簧牢之下牲升于堂樂作于廡以齊以肅以拜以俯我公比隣公我父母追惟平生勿忘吾土時節請帝以相風雨配食一代有污暨隆不如鄉人與其始終始吾莫原終則未已  
銘詩于石維廟之始



梁將軍程忠壯公

靈洗

碑

胡麟

陰陽愆違水旱不節誰其序之天災流行人物疵病  
誰其禦之明爲人福幽爲神助誰其尸之稟稟乎克  
當其任者吾忠壯公之神歟公姓程諱靈洗字元滌  
其先出於黃帝重黎之後自休父仕周宣王爲大司  
馬封程伯其後曰嬰仕晉平公有託孤之德封忠誠  
君東晉時諱元譚者持節爲新安太守有善政詔賜  
宅于歙黃墩子孫遂以爲桑梓自元譚六世生天祚  
仕宋爲山陽內史九世生茂仕梁爲郢州長史皆以

忠勇聞茂生譽梁秘書少監譽生寶惠爲本郡儀曹  
娶安定胡氏而生公公性寬惠孝於親友于弟待群  
下以恕處鄉黨以義別嫌明疑定是正非無得誰何  
者所居之偏其湖深廣有神居焉與呂湖爲隣呂湖  
有蜃素爲居民之害湖之神一夕爲黃冠見夢于公  
曰呂湖蜃稔惡于此不早圖去民其魚乎明日吾復  
與戰披帛於肩者我也以公義士敢以相辱公倘爲  
助酬報敢後翌日公果率鄉之少年鼓譟於湖側而  
俟有頃湖水浩蕩雲霧隱暗兩牛角於灘上而肩白



者屈公挽弓發矢中彼黑者俄而陰晦廓清湖波澄  
靜居不更夕有巨魚死於吉陽灘下卽呂湖蜃也至  
今號其灘曰蜃灘自是呂湖漲塞而居民之害除矣  
越數日有道士叩門候公公爲具饌道士曰公嘗有  
德於我矣又勞雞黍之勤何以爲報吾素習天機書  
能卜善地當隨我以行至黃牢山以白石識之曰遷  
此可暴貴矣公於是爲太夫人壽塋焉梁太寶間侯  
景之亂公據黔歙以拒之侯景移軍新安太守蕭隱  
奔依焉公奉以主盟景不得而陸梁也其後平徐嗣

徽破王琳走周迪敗華皎降元定擒裴寬與士卒同  
甘苦雖節制甚嚴而人樂爲之用太清承聖間除散  
騎常侍建威將軍累遷新安丹陽太守歷譙州青州  
豫州刺史巴丘縣侯食邑千戶事武帝以功授蘭陵  
南陽太守封遂安縣侯遷太子左衛率事世祖爲豫  
州刺史持節西道授都督食邑千戶鼓吹一部班劍  
四十人又遷中護軍出都督郢州廢帝卽位進雲麾  
將軍封重安縣公卒贈鎮西將軍開府儀同三司配  
享武帝廟庭謚曰忠壯夫人董氏生子二十有二人



長文季有高烈傳于公後餘多以功顯於時今程氏  
散處四方者其源皆出黃墩國史家譜載之詳矣故  
此可得而畧也初公微時其聲名氣節達于朝廷嘗  
負鐸視田而詔使踵門公置鐸水中以卜休咎果得  
吉卜今尚有鐸卜坑焉其旁則公之宅也今衆水瀦  
為深湖湖之水清瑩可鑒時有巨鱗聚浮其中人不  
得而漁焉號曰相公湖不數百步公之墓也公嘗自  
營其兆域以緜帛埋之墓前祝曰吾子孫有能大吾  
門戶當生大木以為休證既而藪木生焉今大且十

圍其一不知何代為風雨所樞旁出二枝亦合抱矣  
號曰千年木鄉人遂於其下疊石為壇以奉祭祀號  
曰相公壇公生為黃墩人死為黃墩神祈雨而雨祈  
晴而晴瘟火疾癘有禱即應黃墩之民受公之庇為  
不淺矣曰牛一曰羊一曰豕一與夫脯醢之薦莫不  
時謹故自夏四月秋八月土鼓鼗鼗不絕其聲展敬  
乞靈于祠下者又百餘社陳奠薦辭何其虔也公之  
壇與里之社接宇春秋戊祭以公配焉公之功德與  
勾龍氏相為終始乎暨今數百年而益大故凡謁於



廟者皆願豐碑以識公之始末里人方汝舟實贊成  
之捐金刻石求記於麟惟公歷事梁陳功業著矣雲  
仍誦誦以文章登顯位者代不乏人固有能發潛德  
之幽光以傳不朽而乃屬記於麟其不贅乎蓋嘗證  
於夢寐而僉謀所憑何敢不勉謹按圖經史氏與夫  
講討村老之傳聞端拜而特書之庶幾後人益加嚴  
奉永永不懈亦使訪古者併有所攷焉

嘉熙己亥孟秋既望謹記

宋宜春縣令追封冀國程公元白神道碑

歐陽脩

上卽位之十有六年今鎮安軍節度使檢校太師同  
中書門下平章事程公自三司使吏部侍郎爲叅知  
政事乃詔有司寵其祖考於是贈其皇考故袁州宜  
春縣令爲太子少師公在政事遷尚書左丞又贈太  
子太師其爲資政殿大學士工部尚書又贈太師中  
書令其爲宣徽北院使武昌軍節度使又贈兼尚書  
令其爲武勝軍節度使同中書門下平章事追封定  
國公徙鎮鎮安又追封冀國公諱元白字某少舉明



經仕不得志退居于家畜德不施貽其後世而相國  
太師實爲之子初以文學舉進士高第歷館閣掌制  
命儁德偉望顯于朝廷遂以中丞執國之憲尹正京  
邑有聲蜀都乃由三司入與大政公亦自太常博士  
累贈兵部侍郎遂遷太師中書尚書令位皆一品有  
國定冀以啓其封雖發不自躬而其施益遠晦于一  
時而顯于百世蓋夫享于身者有時而止施于後者  
其耀無窮表于其鄉以勸爲善可謂仁人之利博矣  
惟程氏之先自重黎歷夏商周而程伯休父始見于

詩書其後世遠而分至唐定世族而程氏之望分爲  
七中山之程蓋出于魏安鄉侯昱之後也公世爲中  
山博野人曾祖諱諲祖諱新贈太師祖妣齊氏吳國  
夫人考諱贊明贈太師中書令妣吳氏秦國夫人當  
唐末五代天下亂於兵程氏再世不仕後唐長興三  
年公之皇考以神童舉官至太子贊善大夫宋興天  
下一於今百年而程氏亦再顯太平興國初公之從  
祖羽佐太宗自晉王卽皇帝位爲文明殿學士官至  
兵部侍郎今相國太師出入將相爲時名臣子孫蕃



昌世族昭著推其所自來者遠矣初公與其仲父象明同舉春秋皆中第是時從祖以給事中知開封府召公及象明謂曰吾新被寵天子待罪于此不欲子弟竝登科選使其自擇去就公因讓其從父自引去從祖頗賢之後累舉不中從祖謂曰由我困汝退而使人察公無悔色由是大嗟異之以爲不可及太平興國五年遂以明經中第爲虔州贛縣尉蔡州上蔡主簿袁州宜春令所至皆有惠愛公事母至孝與其兄弟怡怡爲鄉里所稱而仕宦不求名譽爲贛縣尉

七年不代旣罷宜春遂不復仕退居于蔡州淳化三年七月甲子以疾卒于家享年四十有九以天聖十年十一月甲子葬于鄭州管城縣馬亭鄉之北田村夫人楚氏追封晉國夫人子男五人長曰瓘官至太常博士次曰瑗曰琬皆早卒次曰琳相國太師也次曰琰國子博士女一人適某人諸孫九人銘曰遠矣程侯顓頊之苗始自重黎歷夏商周惟伯休父聲詩孔昭世不絕聞盛于有唐程分爲七三祖安鄉廣平中山以暨濟陽中山之程出自靈洗實昱裔孫



仕于陳季陳滅散亾播而北遷公世中山爲博野人  
道德家潛孝悌邦聞不耀自躬以貽後昆惟後有人  
將相文武有國寵章覆具考祖定冀之封實開土宇  
程世其隆公多孫子有畜其源發而孰禦刻銘高原  
以示來者

滂按碑銘所云中山之程出自靈洗靈洗者卽梁  
將軍忠壯公諱先武城公紀程朱三夫子源流所  
云程子先世徙自新安之篁墩者是也方司徒所  
見元祐諸公墨蹟則明道先生圖章用忠壯公喬  
四字又可爲攷古一  
據而文獻有足徵云

宋故文明殿學士尚書兵部侍郎贈太師程公

羽世錄

程琳

五代祖秀生二子長卽吾之高祖也次倣贈少府少  
監生公諱羽字冲遠通經書之學擅詞章之業幼舉  
進士黜于禮部皆侍郎張允知貢舉公每下第輒詣  
門獻文謝不敏允心媿重之天福中允復知貢舉公  
遂登一科調鄆州陽穀縣尉秩滿易帥孫公辟觀察  
支使改華商支使府罷授河中府虞鄉京兆府醴泉  
成都府新都三縣令選東銓引見于崇政殿太祖以  
久次有勞特遷秘書省著作郎知興州未逾年權山



南府太宗潛淵判開封府太祖妙揀時髦備賓僚之  
選宰相趙公普凡三進朝臣名不可上意一旦太祖  
謂趙相曰吾自得之矣昔者縣令授著作郎程羽在  
何處可召來除判官時與權官買琰同幕也太宗承  
乾纂緒升離繼照雲龍昏會千載一時超授給事中  
權知開封府并門不稟正朔太宗將興問罪之師且  
以坤維遠服藉人鎮撫非公才不可倚出知益州陞  
辭面諭曰此行非大事不久當召卿至任幾二載召  
還授禮部侍郎文明殿學士以宗伯之任選群材時

謂得人上益知遇之護從北狩感疾甚累拜章求  
致政不遂所請郊祀恩改兵部侍郎終于位太宗聞  
訃驚悼曰方將大用贈禮部尚書累贈太子少師生  
一男希振終於虞部員外郎希振生三男長適終于  
右班殿直次適終于黃州黃陂縣令次道無祿而卒  
適生三男長珣見任殿中丞次璠見任贊善大夫次  
琬未仕道一男瑜汝州龍興令監解州安邑鹽池公  
以耆艾之德逢熙洽之運寵遇隆重才望烜赫而不  
登三事弼輔萬幾命矣夫先是公自醴泉移新都屬



國都新定川蜀所在盜起入劔門塗梗不可進棄官  
東歸俄而令下有司有不之任官謫嶺表永不錄敘  
公卽時奔赴交代以親老有退之志端居醴泉私第  
晨夕潔養恬素爲樂無何鎮將使酒凌公公慷慨發  
憤受代詣闕遂遇太宗拔擢登翊王府斯亦命歟乎  
生所著文稿未嘗編綴門戶零替嫡嗣繼亾篋笥弗  
收散落殆盡前歲從弟珣寄公五七言詩一軸廿六  
首云偶得於他所吾因畧敘夫宗派世家附于貽範  
集云

大宋勅賜故推誠保德守正翊戴功臣鎮安軍  
節度陳州管內觀察處置等使開府儀同三司  
檢校太師同中書門下平章事判陳州軍州事  
上柱國廣平郡開國公食邑七千四百戶食實  
封二千一百戶贈太師中書令兼尚書令謚文

簡程公琳神道碑

歐陽脩

惟文簡公既葬之二年其子嗣隆泣而言于朝曰先  
臣幸得備位將相官階品皆第一爵勲皆第二請得  
立碑如令於是天子曰噫惟爾父琳有勞于我國家



予其可忘乃大書曰旌勞之碑遣中貴人卽賜其家  
曰以此名爾碑又詔史臣脩曰汝爲之銘臣脩與文  
簡公故往來知其入又嘗誌其墓又嘗述其世德于  
冀公太師之碑得其世次官封功行最詳乃不敢辭  
惟公字天球姓程氏曾祖諱新贈太師曾祖妣吳國  
夫人齊氏祖諱贊明贈太師中書令妣秦國夫人吳  
氏考諱元白袁州宜春令贈太師中書令兼尚書令  
冀國公妣晉國夫人楚氏公舉太中祥符四年服勤  
辭學高第試秘書省校書郎秦寧軍節度推官改著

作佐郎知并州壽陽縣秘書丞監左藏庫天禧中召  
選文學履行召試直集賢院今天子卽位遷太常博  
士三司戶部判官會脩真宗實錄而起居注闕命公  
追脩太中祥符八年已後書成遂脩起居注遷祠部  
員外郎提舉諸司庫務以本官知制誥同判吏部流  
內銓契丹嘗遣使賀上卽位命公迓之使者妄有所  
言公折以理遂屈服其後又遣使賀天聖五年乾元  
節天子思公前嘗折其使乃以公爲館伴使使者果  
言契丹見中國使者坐殿上位次高而中國見契丹



使者位下當遷議者以爲小故可許雖天子亦將許之公爭以謂契丹所以與中國好者守先帝約也一切宜用故事若許其小將啓其大天子是之乃止歲中遷右諫議大夫權御史中丞丞相張文節公少所稱許而最知公方除中丞文節當執筆喜曰不辱吾筆矣明年拜樞密直學士知益州公性方重寡言笑凡所處畫常先慮謹備所以條目巨細甚悉至臨事簡嚴僚吏莫能窺其際嘗夜張燈會五門大集州民而城中火起吏如公教不以白而隨卽救止終宴民

去始稍知火監軍得告者言軍謀變懼而入白公笑曰豈有是哉監軍惶惑不敢去公曰軍中動靜吾自知之苟有謀者不能隱也已而卒無事其他多類此蜀妖人自名李冰神子署官屬吏卒以恐蜀人公捕斬之而謗者言公妄殺人蜀且亂天子遣人馳視之使者還言蜀人便公政方安樂而誅妖人所以止亂由是天子益知公賢召爲給事中知開封府前爲府者苦其治劇或不滿歲罷不然被謗譏或以事去獨公居數歲久而治益精明盜訟稀少獄屢空詔書數



下褒美遷工部侍郎龍圖閣學士守御史中丞久之  
天子思其治召爲翰林學士復知開封府明年爲三  
司使不悅苟利不貪近功時議者患民稅多目吏得  
爲姦欲除其名而合爲一公以謂合而沒其名一時  
之便後有興利之臣必復增之是重困民也議者莫  
能奪其於出入尤謹禁中時有所取未嘗肯予宦官  
怒言陛下雖有所欲物在程某何可得公曰臣所以  
爲陛下惜耳天子以爲然累遷吏部侍郎景祐四年  
以本官叅知政事遷尚書左丞公益自信不疑宰相

有所欲私輒衆折之其語至今士大夫能道也初范  
仲淹以言事忤大臣貶饒州已而上悔悟欲復用之  
稍徙知澗州而惡仲淹者遽誣以事語入上怒亟命  
置之嶺南自仲淹貶而朋黨之論起朝士牽連出語  
及仲淹者皆指爲黨人公獨爲上開說上意解而後  
已是時元昊叛河西朝廷多故公在政事補益尤多  
而小人僥倖皆不便遂以事中之坐貶爲光祿卿知  
潁州已而徙知青州又徙大名府居一歲中遷戶部  
吏部二侍郎尚書左丞資政殿學士北京建遂以爲



留守宦者皇甫繼明方用事主治行宮務廣制度以  
市恩公為裁抑之與繼明章交上天子遣一御史往  
視之還直公天子為罷繼明獨委公以建都事公自  
知政事以論議不私見嫉被貶斥已稍復見用遂與  
繼明爭曲直由是益不妄合於世雖不復大用而契  
丹方遣使數有所求兵誅元昊未克西北宿重兵公  
於是時天子常委以河北陝西之重留守北京凡四  
年遷工部尚書資政殿大學士河北安撫使慶曆六  
年拜武昌軍節度使陝西安撫使知永興軍府事明

年加宣徽北院使鄜延路經畧使馬步軍都部署判  
延州仍兼陝西安撫使皇祐元年加同中書門下平  
章事留守北京其於二方威惠信著尤知夷狄情偽  
山川險易行師制勝之要其在延州夏人數百驅畜  
產至界上請降言契丹兵至衙頭矣國且亂願自歸  
公曰契丹兵至元昊帳下當舉國取之豈容有來降  
者乎聞夏人方捕叛族此其是乎不然誘我也拒而  
不受已而夏人果以兵數萬臨界上公戒諸堡塞無  
得數出兵夏人以為有備引去自此不復窺邊公於



河北最久民愛之為立生祠明年改武勝軍節度使  
猶在北京又改鎮安軍節度使在鎮四年猶上書鎮  
安一郡爾不足以自効願復守邊書未報得疾以至  
和三年閏三月七日巳丑薨于陳州之正寢享年六  
十有九天子輟視朝二日贈中書令謚曰文簡以嘉  
祐二年二月十八日葬河南府伊闕縣神陰鄉張留  
里明年祫享太廟推恩加贈公太師尚書令公累階  
至開府儀同三司勳上柱國開國廣平郡爵公封戶  
七千四百而實封二千一百賜號推誠保德守正翊

戴功臣娶陳氏封衛國夫人子男四人曰嗣隆太常  
博士嗣弼殿中丞嗣恭太常博士嗣先大理寺丞女  
五人皆適良族謹按程氏之先出自重黎至休父為  
周司馬國於程其後子孫遂以為氏自秦漢以來世  
有其人程氏必顯而各以其所居著姓後世因之至  
唐尤盛號稱中山程氏者皆祖魏安鄉侯昱公中山  
博野人也世有積德至公始大顯聞臣脩以謂古者  
功德之臣進受國寵退而銘於器物非獨私其後世  
所以不忘君命示國有人而詩人又播其事聲於詠



訶以揚無窮今去古遠爲制不同而猶有幽堂之石  
隧道之碑以紀德昭烈而又幸蒙天子書而名之其  
所以照臨程氏恩厚寵榮出古遠甚而臣又得刻銘  
其下銘臣職也懼不能稱銘曰

程以國氏世遠支分因居著姓各以其人公世中山  
在昔有聞充大自公厥聲以振乃秉國鈞乃授將鉞  
出入其勤險夷一節帝曰噫歟予有勞臣何以旌之  
有爛其文惟此勞臣實予同德憂國在心匪勞以力  
二方有事諸將無功俾我舊老不遑居中間息近藩

庶休厥躬有請未報奄云其終歿而後已茲可謂忠  
惟帝之褒其言甚簡銘以述之萬世丕顯

自撰墓誌

程太中公

程姓珣名伯溫字姓源世系詳于家牒故不復書曾  
王父尚書兵部侍郎贈太子少師諱羽曾王母清河  
太君張氏襄陵太君賈氏王父尚書虞部員外郎諱  
希振王母高密縣君崔氏考贈司空諱通妣追封趙  
國太夫人張氏冀國太夫人張氏予性質穎蒙學術  
黷淺不能自奮以嗣先世天聖中仁宗皇帝念及祖



宗舊臣例祿子孫一人補郊社齋郎歷黃州黃陂吉  
州廬陵二縣尉潤州觀察支使由按察官論薦改大  
理寺丞知虔州興國縣龔州徐州沛縣監在京西染  
院知鳳磁漢三州事熙寧中厭於職事丐就閑局得  
管勾西京嵩山嵩福宮歲滿再任遂請致仕官自大  
理寺丞十三遷至太中大夫勳自騎都尉至上柱國  
爵永年縣開國伯食邑戶九百娶侯氏贈尚書比部  
員外郎道濟之長女封壽安縣君先三十八年卒追  
封上谷郡君男六人長應昌次天錫皆幼亡次顥承

議郎宗正寺丞先卒次頤今爲通直郎次韓奴蠻奴  
皆夭女四人長婆嬌幼亡次適奉禮郎席延年次馮  
兒幼亡次適都官郎中李正臣孫男五人長端懿蔡  
州汝陽縣主簿監西京酒次端中治進士業次端輔  
早亡次端本治進士業次端彥郊社齋郎孫女八人  
長適宣義郎李偲次適假承務郎朱純之次適安定  
席彥正次未嫁而卒次爲李偲繼室次適清河張敷  
次幼亡曾孫男六人昂昇曷易旻羣曾孫女一人元  
祐五年庚午春正月十三日巳卯以疾終于正寢先

居



暖室既得疾  
命遷正寢

享年八十五越二月孟夏庚戌塋葬於

伊川先塋之次上谷郡君祔焉予歷官十二任享祿  
六十年但知廉慎寬和孜孜夙夜無勲勞可以報國  
無異政可以及民始終得免瑕謫為幸多矣葬日切  
不用子求時賢製撰銘誌既無事實可紀不免虛辭  
溢美徒累不德再只用此文刻於石向壁安置若或  
少違遺命是不以為有知也先公太中年七十則自  
為墓誌及書戒命於後  
後十五年終壽子孫奉命不敢違惟就其闕處加所  
遷官爵晚生諸孫及享年之數終葬時日而已醇德  
懿行宜傳後世者皆莫敢  
誌著之家牒孤頤泣血書

婺源茶院朱氏世譜後序

朱文公

熹聞之先君子太史吏部府君曰吾家先世居歙州  
歙縣之黃墩相傳望出吳郡秋祭率用魚鱉唐天祐  
中陶雅為歙州刺史初克婺源乃命吾祖領兵三千  
戍之是為制置茶院府君卒葬連同子孫因家焉生  
三子仕南唐補常侍丞之號其後亦有散居他郡者  
熹按今連同別有朱氏舊不通譜近年乃有自言為  
茶院昆弟之後者猶有南唐補牒亦當時鎮戍將校  
也蓋其是非不可考矣先吏部於茶院為八世孫宜



和中始官建之政和而葬承事府君於其邑遂為建  
人于今六十年而熹抱孫焉則居閩五世矣淳熙丙  
申熹還故里將展連同之墓則與方夫人十五公馮  
夫人之墓皆已失之因亟詢訪得連同北域所在乃  
率族人言於有司而後得之其文據藏於家副在族  
弟然而三墓者則遂不可復見癸卯五月辛卯因閱  
舊譜感世次之易遠骨肉之易踈而墳墓之不易保  
也乃更為序次定為婺源茶院朱氏世譜而併書其  
後如此仍錄一通以示族人十一世以下來者未艾

徽建二族自今每歲當收名數更相告語而附益之  
庶千里之外兩書如一傳之永遠有以不忘宗族之  
誼至於蘆村府君其墓益遠居故里者尤當以時相  
率展省更力求訪三墓所在而表識之以塞子孫之  
責而熹之曾大父王橋府君無他子其墓在故里者  
恃有薄田於其下得以奉守不廢當質諸有司以為  
祭田使後之子孫雖貧無得鬻云九世孫宣教郎直  
徽猷閣主管台州崇道觀熹序

先君森行狀

朱獻靖公



公諱森字良材姓朱氏世家歙州之黃墩七世祖天  
祐中以陶雅之命總卒三千戍婺源邑民賴以安因  
家焉曾祖甫祖振父絢皆不仕公少務學科舉既廢  
不復事進取既冠而孤他日歲時子姓爲壽舉先訓  
戒飭諸子諄諄以忠孝和友爲本且曰吾家業儒積  
德五世後當有顯者當勉勵謹飭以無墜先世之業  
已而嗚咽流涕以奉養日短爲終身之憂胸中冲澹  
視世之榮利泊然若不足以于其心者家人生產未  
嘗掛齒子松遊鄉校時時小得失無所欣戚家既素

單久而益急或勸事生業曰外物浮雲再無庸有爲  
也使子賢雖不榮於我足不然適重爲後日驕縱之  
資再獨見松從賢師友游則喜見言色其篤於道義  
而鄙外浮榮蓋天資云晚讀內典深解義諦時時爲  
歌詩恍然有超世之志與人交無賢否皆得其懽心  
然胸中白黑了然人莫能名其爲通與介也以某年  
月日卒於建州政和之官舍享年若干娶程氏三男  
松舉進士迪功郎初尉則政和也次檉次樺二女未  
適人將以某年月日寓塋于政和護國院之側謹狀



右先大夫贈承事郎府君行狀先君太史吏部贈通議大夫君所撰也當時既以請銘於政和主簿盧君點未及礮石而羣盜竄起文書散逸於今僅存半藁不可復刻矣熹竊惟念吾家自歙入閩而府君始葬於此不可使後之子孫不知其時世歲月與其所以積德垂慶開祐後人之深意敬立石表刻狀下方樹于墓左先世墳廬在婺源者及祖妣孺人以下別葬所在亦具刻于碑陰使來者有考焉廬君字師予老儒博學清謹有別行定宅者弋陽金生字確然亦廉節士頗通方外之學姓字皆見先集云慶元五年十月有二月甲子孝孫朝奉大夫致仕熹謹記

宋史館吏部贈通議大夫朱公松神道碑

周益公

祖宗時擇儒學為館職自館職擇侍從由侍從擇輔

相所謂儒學者明仁義禮樂通古今治亂其議論可與謀慮大事決疑定策文章特一事耳治平中歐陽文忠公在政府奏疏如此尋命宰執各薦士其效見於元祐之際高宗方內修外攘著置秘書省以儲人才他有司治事日不暇給獨館職涵養從容要路闕必由此選國朝盛舉乃復見之新安朱公蓋其一也公諱松字喬年世家婺源曾祖振妣汪氏祖絢妣汪氏父森常曰吾家五世積德業儒當有顯者後贈承事郎妣儒人程氏公生以紹聖四年兒時出語驚人



未冠力學繇郡庠貢京師文體清新恥於蹈襲政和  
八年上舍登第以迪功郎調建州政和尉丁父憂服  
除再調南劍州尤溪尉監泉州石井鎮詩名聞四方  
他文溷涵流轉惟意所適然謂於道為遠益取經子  
史傳考其興衰治亂欲應時合變見之事業又因師  
友浦城蕭顛子莊劍蒲羅從彥仲素而得龜山楊文  
靖公河洛學問之要拳拳服膺每疑卞急害道取佩  
韋之說名齋自警在尤溪聞靖康北狩大慟幾絕自是  
奔走卑冗假祿養親無仕進意紹興初監察御史故

世將撫諭入閩公袖書告之曰今不自荆襄赴興元  
結夏人控引五路東嚮爭中原則當幸金陵固守荆  
淮柰何局促一方徒費日月竟將何為世將奇其才  
歸薦于朝會前執政謝公克家守泉南亦露章薦公  
學問不宜滯管庫遂召試館職策問中興難易公乞  
順人心任賢才正綱紀累數千言辨論精博高宗嘉  
賞除秘書省正字四年二月循左從政郎趙忠簡公  
以元樞都督諸路軍馬約公入幕公以親疾辭尋丁  
母憂士年服闋上已進都金陵九月再召對公勸上



抗志高明垂精延訪求經遠持久計遂言中興之君  
惟光武身濟大業可以為法元帝肅宗志趣卑近宜  
以為戒上明日對輔臣稱善且謂光武無可議肅宗  
雖優於元帝然虧人子之行於其終為可恨也特改  
左宣教郎除校書郎是時呂祉代劉光世統軍淮西  
鄴瓊擁眾叛去廟論欲斂兩淮戍兵衛行都公率同  
列疏言不可亦會虜疑劉豫得叛兵不可制執而廢  
之當路不能乘機會乃亟還臨安八年三月遷著作  
佐郎御史中丞常同薦公可任大事四月復賜對公

言國論不過兩端進取者失之踈玩愒者失之媮惟  
自治觀釁為上策願陛下並進忠賢脩明紀律革姑  
息振國勢虜不足平也上悅擢尚書度支員外郎兼  
史館校勘刊脩蔡卞所改哲宗實錄公用力為多歷  
司勳及吏部員外郎史職如故實錄成遷左奉議郎  
磨勘轉承議郎趙忠簡公罷相秦忠獻公當國決意  
謹和公與史官胡瑄凌景夏常明范如圭合奏陛下  
以梓宮母兄天屬未歸不憚屈已和戎曾不思項羽  
置太公俎上邀高祖高祖知其詐日夜思所以感羽



者彼兵疲勢窮太公自歸此今日龜鑑也秦方惡公  
異議叅知政事李莊簡公又力援公屬虜使再至許  
歸河南地公請用漢制命廷臣雜議又言二三大將  
握重兵將有尾大之患請復武舉儲將師選驍勇補  
則衛擇守帥壯藩維興太學明大倫以倡節義規模  
大率類此秦滋不樂諷言者論公懷異自賢出知饒  
州十年春也未上請主管台州崇道觀和議俄變秦  
蒼黃不知所措有郎官代作自解之奏曰伊尹告成  
湯德無常師主善為師臣前贊議和今請伐虜是皆

主善為師如其不濟則陳力就列不能者止當遵孔  
聖之訓秦大喜擢郎官為右史而不暇問所引皆誤  
也是時祕書省寓法慧寺大書于門云周任為孔聖  
太甲作成湯秦大怒疑出於館職相繼汰去而引用  
其黨公遂不可出矣祠滿再任命下而卒十三年三  
月辛亥也享年四十有七公性孝友於朋友重然諾  
不以死生窮達易其志誘進後學揚人之善凡邪佞  
鬼鎖鄙而遠之沒一甲子秦斃異時名士抑遏竄逐  
者悉起為大官獨公無年識者惜之其將終也手書



與所善胡憲原仲劉勉之致中劉子翬彥冲屬其子  
熹使往受業其後遂以粵學高文推重當世今上聞  
其名以待制侍講禁中累贈公通議大夫初公卒之  
明年葬建寧府崇安縣五夫里西塔山勢頗卑下乃  
卜慶元某年某月某日還葬武夷鄉上梅里寂歷山  
中峰僧舍之北公嘗賦詩有鄉閔落日蒼茫外尊酒  
寒花寂歷中之句茲其讖乎待制以某先太師與公  
為同年進士故來請銘公娶同郡祝氏處士確之女  
贈碩人事姑孝謹待內外姻親和順得其懽心後公

二十七年卒別葬建陽縣崇泰里後山鋪東寒泉塢  
一男熹也女嫁瀏陽丞劉子翔早世孫男三長塾已  
亡次楚將仕郎次在丞務郎女三人脩職郎劉學古  
迪功郎黃榦進士范元裕其婿也曾孫男五人鉅鈞  
鑑鐸銓女九人長適文林郎趙師夏餘未行公平生  
所為文有韋齋集十二卷行於世外集十卷藏于家  
吏部侍郎徐度自言少多與前輩游迨識公及張戒  
定夫始得為文之法欲為公集序未及成而文十傳  
自得實為之謂公詩高潔幽遠其文溫婉典裁非溢



美也公母弟棹亦負軼才不肯俯仰於世有詩數十  
篇高遠近道號玉瀾集云銘曰  
信道惟人窮理以書合而一之乃曰通儒表表朱公  
邁往于初師友淵源名實允孚蘭臺史觀卿材是儲  
有昌其言有宏厥模人雖我抑豈無後圖高皇更化  
羣賢畢趨公則逝矣齋志弗紓幸哉有子播穫菑畲  
追爵黃散肇營新墟揭以銘章永鎮龜趺


尚書吏部員外郎朱君孺人祝氏壙誌

朱文公

先妣孺人祝氏徽州歙縣人其先爲州大姓父諱確  
始業儒有高行娶同郡喻氏以元符三年七月庚午  
生孺人性仁厚端淑年十有八歸于我先君諱松字  
喬年姓朱氏逮事舅姑孝謹篤至有人所難能者以  
先君校中祕書賜今號及先君卒熹年才十有四孺  
人辛勤撫教俾知所向不幸既長而愚不適世用貧  
病困蹙人所不堪而孺人處之怡然乾道五年九月  
戊午卒年七十生三男伯仲皆夭熹其季也嘗爲左  
迪功郎差充樞密院編修官一女適右迪功郎長汀



縣主簿劉子翔孫男塾在女巽兌皆幼越明年正月癸酉葬于建寧府建陽縣後山天湖之陽東北距先君白水之兆百里而遠不孝子熹號慕隕絕敢竊記壙中如此昊天罔極嗚呼痛哉



熹



